

弘

簡

錄

弘簡錄卷二百二十五

明刑部員外郎仁和弘齋邵經邦學

皇清翰林院侍講學士四世孫遠平校閱

載記 金內族五 太宗以下子孫

宗磐

宗固宗本宗美

光英

附訛里也

元壽

補胡思阿補廣陽

允恭

子琮璵璵璵璵

永中

永順

永功

子瑞

永德

永成

永升

按辰

從格

守忠

守純

訛可

太宗子宗磐本名蒲魯虎天輔五年從斜也取中京以為副使
天會十年為國論忽魯勃極烈熙宗即位優禮宗室拜尚書令
封宋國王未幾進太師與宗翰並領三省事沒後日益跋扈嘗
與宗幹爭論熙宗但為兩解驕恣不改輒於上前持刀向宗幹
都點檢蕭仲恭呵止之後伏誅 宗固名胡魯天眷元年與胡

魯補等十三人皆封爲王久之同判太宗正事皇統六年爲太保右丞相兼中書令明年薨 宗本名阿魯皇統初拜司空九年三月辛丑爲右丞相兼中書令九月庚戌進太保領三省事游陵心忌太宗諸子嘗與熙宗私議宗本等勢強主上不宜優寵太甚及篡立進爲太傅猜忌益深與蕭裕謀使蕭玉告宗本親與玉言汝於我故舊可布腹心秉德臨行時言彼領行臺在外諭悅軍民內倚太傅爲應何事不成又內侍張彥善相相太傅有天子分其長子鎮里虎當大貴主上見之輒不喜故心常恐懼不令入見若太傅一日得大位此心方安因與玉馬一匹袍一領克表識物時玉出入其家親信如家人海陵因詔天下庶可示信陽使人召與擊鞠陰命左衛將軍徒單特思并裕妹婿近侍局副使耶律闢離刺密伺宗本及判太宗正事宗美至

卽殺之宗美名胡里卽臨死神色不變復遣使殺東京留守宗懿北京留守卞益都尹鼎王宗哲平陽尹稟左宣徽使京等凡七十餘人家屬分置別所使人要之於路并子男無少長皆殺之而中京留守宗雅喜佞佛海陵知其無能將存之以奉太宗後名至闕不數日竟殺之太宗後遂絕卞本名可喜稟名胡里改京宗固子名胡什資大定二年追封宗固魯王宗雅曹王宗順隋王宗懿鄭王宗美衛王宗哲韓王宗本潞王神土門幽王斛孛束瀋王幹烈鄂王胡里改胡什資可喜並贈金吾衛上將軍惟宗磐宗傳阿魯補斛沁虎鶻懶不復加封

海陵子阿魯補襁褓時養于宗正方家賜以錢千萬移永寧宮及徒單斜也家又以燕京轉運使趙襲慶多男冒名曰趙六後賜名光英改鷹坊爲馴鷺坊英國爲壽國應國爲杞國宋光州

爲蔣州光山縣爲尉思縣光化軍爲通化軍以避其諱天德四年立爲皇太子因安置太祖畫像于武德殿盡召國初破寧江州有功者得百七十六人並加宣武將軍賜以酒加帛有忽里罕者年百歲有子十人解其衣以進願太子壽考多男與小臣等海陵使光英受其衣卽各賜以所服并佩刀太醫院保全郎李中保和大夫薛遵義俱以醫藥入侍迺換宣武將軍太子左右衛副率貞元元年詔京朝官五品以下率引自通天門入居于東宮正隆元年三月二十七日慶誕宴百官于神龍殿賜京師大酺一日恐其繁懦令習騎射四年八月射鵝獲之海陵大喜命薦原廟賜馬一匹黃金三斤班賜從者有差六年行幸南京次安州射獲二兔居數日復獲二兔俱薦于山陵從官皆稱賀賜名馬弓矢六月至南京與共載入汴羣臣迎謁嘗言俟

太子年十八付以天下朕當日遊宴於宮掖苑囿中以自娛樂
又見其天資警悟宜擇碩德宿學之士以輔導之使知古今防
過失一日因誦孝經忽語人曰經言三千之罪莫大於不孝主
何而言其人對曰今民家子博奕飲酒不養父母皆不孝也光
英默然良久曰此豈足爲不孝耶其意蓋指海陵弑母之事及
伐宋留之君守臨別挽衣號慟左右皆泣以施滿訛里也爲太
子少師兼河南路統軍使以衛護之遇弑之日督府移文殺之
時年十二世宗聞之不忍言使光英若在朕必保全之葬於大
房山諸王墓次訛里也咸平路窟吐忽河人襲其父忽土猛
安除邳州刺史三遷昌武軍節度使歸德尹南京留守大定二
年爲元帥右都監宋人陷陳蔡師久無功解其職俄起爲京兆
尹門多私謁百姓惡之三年卒

元壽母大氏元妃之妹名蒲速婉乃判太宗正阿里虎妻因入見逼迫淫之天德元年元壽生封崇王三年薨 矧思阿補母唐括氏名石哥定哥之妹乃宗望子文之妻海陵私之語文庶母按都瓜必出而婦不然我將別有所行按都瓜以語文初意難之勸以不從必殺汝豈以一妻而自禍其身耶文不得已相與抱持慟哭而訣時已遷都至中京納之因名文至便殿使保於其前穢談戲笑大以爲樂定哥死遣令出宮不數日復召入封爲修容進昭儀正隆元年四月阿補生小底東勝家賜錢千萬令保養之仍爲起第五月己酉彌月封母爲柔妃賜京師貧者五千人錢二百二年生日海陵與永壽太后及皇后太子幸東勝家亦三歲薨追封宿王葬大房山殺太醫副使謝友正醫者安宗義及其乳母杖東勝一百除名。廣陽母南氏本大臭

家婢隨元妃入宮海陵幸之卽有娠命爲殿直正隆二年九月生十月滿月分施在京貧民用錢千貫三年二月封南氏爲才人七月封廣陽爲滕王九月薨

世宗嫡子允恭本諱胡士瓦母烏林答氏以皇統六年丙寅歲生體貌雄偉孝友謹厚卽位初封楚王置官屬從至中都大定二年四月己卯賜名允迪立爲皇太子面諭在禮貴嫡所以立汝宜友于兄弟接百官以禮勿以儲位自生驕慢日勉學問非有召命不須侍食上表稱謝自是專心問學與諸儒臣講議於承華殿燕閒觀書乙夜忘倦輒以疑字付儒臣校證九月庚子詔東宮三師對皇太子稱名少師以下稱臣十一月庚子生辰百官賀于承華殿賜襲衣良馬賜宴于仁政殿皇族皆與自後或幸東宮或宴內殿歲以爲常十二月辛卯太子奏東宮賀禮

親王及一品皇族皆北面拜伏。臣但各掛有所未安。伏望天慈聽臣答拜。庶惇親睦之道。詔從之。立爲定制。上聞博州防禦同知致仕鄭松耆儒且賢。起爲左諭德。特免朝參。專輔太子讀書。松以友諭自處。帝嘗顧松使取服帶。對曰。臣忝諭德。不敢奉詔。帝改容稱善。自是益加禮遇。每出獵。獲鹿輒分賜之。四年九月。納妃徒單氏。行親迎禮。故事。皇太子鹵簿乘金路。禮官不知。請就乘大駕。綬路上疑其非禮。制禮部郎中李邦直員外郎李山一階太常少卿武之才丞張子羽博士張槃兩階。頃之議受冊。謁謝太廟。服常朝服。乘馬上。謂與外官上後謁諸神廟無異。海陵一時率意行之。何足爲法。今大冊與三歲祫享當用古禮。爲是不當輕易如此。時右丞蘇保衡雖漢人不通經史。參政石琚通經史而不言。仍令禮官具前代典禮以聞。朕將擇而處之。會

將授太子冊寶有司具儀注備儀仗告太廟上又言朕受尊號
嘗用故宋真宗故事謁謝常朝服乘馬皇太子乃用備禮前後
不稱語宰臣良弼守道此卿等因循不用心所致皆頓首謝是
年十月祫享于太廟行亞獻禮七年有疾詔守道侍湯藥徙居
瓊林苑臨芳殿調治八年正月改賜今名庚戌受皇太子冊寶
復上表謝九年五月命避暑于草澤隋王惟功從行皆給道路
輿辭以遠去闕廷獨就涼地非臣子所安上曰汝體羸弱山後
高涼故命汝往丁丑百官奉辭于都城之北再拜答之上詔百
官兩具箋問起居八月乙酉還京百官迎謁如前丙戌入見上
曰吾兒相別經夏極甚思憶九月詔皇太子供膳歲給五十萬
勿月支十年八月在承華殿經筵太子太保壽王爽啓曰殿下
頗未熟本朝語何不屏去左右漢官皆用女直人答曰凡諸侍

從皆上所置。曷敢輒去。揖與退。曰。宮官四員。謂之諭德。贊善。義
可見矣。而反欲去之。無學故也。有使者自山東還。問以民間何
所苦。對曰。錢難。太子曰。貯之空室。雖多奚爲。仍語戶部尚書張
仲愈。天子富藏天下。何必獨在府庫。因奏錢在府庫。何異銅鐵
在野。乞流轉使用。公私俱利。世宗嘉納。詔有司議行之。明年有
事於圓丘。行亞獻禮。十二年。上聞德州防禦使胡剌謀叛。囚曰。
朕於親親之道。未嘗不篤。何輒敢如此。徐奏叔胡剌性荒縱。耽
娛樂而無子嗣。如此狂謀。望更閱實之。十月己未。祫享太廟。命
攝行祀事。十三年。詔太子詹事劉仲誨。東宮官屬尤當選用。正
人。如行檢不修。及不稱職者。具以名聞。十月。與趙王惟中。曹王
惟功。獵于保與定州。十一月甲午。還京。十四年四月。太子及諸
王侍上於垂拱殿。論及兄弟妻子之際。對曰。思齊之詩。曰。刑于

寡妻至于兄弟以御于家邦臣等愚昧願相勵而修之退而引
常棣華萼相承脊令急難之義爲文見意以誠兄弟焉十五年
詔五品職事官謝見皇太子十七年五月甲辰侍宴于常武殿
典食令湟合進粥將舉食有蜘蛛在盤中湟合恐懼失措從容
語曰蜘蛛吐絲乘空忽墮此中爾豈汝罪哉十月己卯祫享太
廟十九年四月戊申有事于太廟皆命攝行祀事丁巳詹事烏
林荅忽入謝太子命取幘頭展帶官屬請曰此見宰相師傅之
禮語以愿事父皇久以此加敬爾皆贊曰非臣等所及十一月
改葬明德皇后于坤厚陵太子徒行輓靈車遇大風雪左右進
雨具却之比至墳所衣盡濡觀者無不下淚二十三年上表
奏諭熙宗世嫡統緒海陵無道弑之自立削其煬王仲齒庶人
之列而反追崇其親逆祀于廟雖以宗幹前殂不預惡逆而明

肅帝號禮當削奪。明詔中外。俾知大義。上嘉納之。二十四年。將幸上京。詔太子居守。作守國之寶。以授事于郊廟。并除授五品以上官。及利害重者。遣使馳奏。其六品以下官。與常事並聽裁決。每三日。尚書省於集賢殿啓事。京朝官遇朔望。具朝服問候。車駕在路。每二十日一遣使問起居。以達上京。稍稍十日臨行。諭以上京祖宗興王之地。欲與諸王一到。或留一二年。以汝守國。譬之農家種田。商人營利。但能不墜父業。卽爲克家之子。況社稷任重。尤宜畏慎。常時觀汝甚謹。今日能紓朕憂。乃見中心孝道也。對曰。臣在東宮二十餘年。過失甚多。陛下以明德母后之故。未嘗見責。臣誠愚昧。不克負荷。願備扈從。上曰。凡人養子。皆望投老得力。朕留太尉左右丞參政。輔汝。彼皆國家舊人。可與商議。且政事無難。但用心公正。無納讒邪。一月之後。政事自

熟流涕堅辭。廷臣爲之感動。其左右侍中親昵者各爲得意。太子知之。諭曰。我向在東宮。不親國政。日與汝輩話言。步于芳苑。中出入往來。未嘗限阻。今旣守國。汝等有召命。然後得入。五月。駕至。賜以敕書。朕以前月八日到遼陽。此月二日達上京。翌日。祀慶元廟。省方觀民古之制也。汝守國任重。夏暑方熾。益當自愛。無貽朕憂。自是凡有所啓稟。輒自披閱。名都事委曲折正。移晷忘倦。或賜之食。近侍報瑤池位蓮開。當設宴却之曰。聖上東巡。命我守國。何敢宴遊。廢事採致數花足矣。七月遣子金源郡王麻達葛奉表起居。兼請還都。十一月壬寅冬獵。辛亥還。二十五年正月乙酉朔。免羣臣賀禮。自守國以來。深懷謙抑。宮臣不遇。庭拜啓事時。不侍立。京朝朔望日。並停免公服。問候甲寅如春水。二月庚申還都。丁卯復遣子奉表賀萬春節。四月久不雨。

親行祈禱卽日霑足六月甲寅不豫庚申薨于承華殿上還次
天平山好水川訃聞驚悼爲位行宮之南臨奠大慟者久之親
王百官皇族命婦及侍衛皆會哭還宮號泣比至中都爲位奠
哭者七以幽王承成爲中都留守護喪遣左宣徽使唐括鼎致
祭詔妃及諸皇孫喪服並如漢制其在儲位久恩德在人者深
每日三時侍衛軍士皆爭入伏哭于承華殿下聲殷如雷中都
百姓市門巷端爲位慟哭七月壬午朔賜諡宣孝太子九月庚
寅殯于南園熙春殿已酉駕至未入國門先至熙春殿奠哭比
葬六往臨之其事世宗凡巡幸西京涼陘及上陵祭廟謁衍慶
宮田獵觀稼拜天射柳未嘗去左右國有大慶率百官上表賀
正旦萬春節總班上壽十月庚戌朔宰相以下朝見于慶和殿
太尉完顏守道上壽世宗追悼悽愴者久之十一月甲申薨駕

發引上親路祭于都城之西庚寅附葬大房山上卽欲加帝號以問羣臣修撰趙可舉唐高宗追諡太子弘孝敬皇帝爲對左丞張汝弼以爲出于武后遂止乃建廟于衍慶宮後祭用三獻樂川登歌及子璟爲皇太孫卽位五月甲午追諡體道弘仁英文睿德光孝皇帝廟號顯宗丁酉附于太廟陵曰裕陵生平天性仁厚不忍刑殺梁慄兒盜金銀葉憐其母老卒福興盜段匹值坤厚陵禮成家令本把盜銀器值萬春節皆委曲全活之亡失物者責其償而不加罪問四方饑饉輒先奏加賑贍因田獵出巡所過問民疾苦敬禮大臣友愛兄弟嘗作重光座銘及刻左右銘于小玉碑并刻其碑陰皆深有理致最善射而不殫物嘗奉詔拜陵先射一鹿獲之卽命罷獵日足奉祀事焉用多殺好生蓋其天性云子琮本名承慶母田氏封克華爲人儀觀

豐偉機警清辯性寬厚好學世宗選進士有名行者納坦謀嘉
教之女直小字并漢字皆通習及長輕財好施無慍色善吟咏
不喜聞人過至騎射繪塑之藝皆造精妙大定十八年封道國
公俱加崇進章宗卽位與諸弟皆遷開府儀同三司琮加封鄆
王明昌元年授婆速路獲火羅合打世襲猛安留京師五年薨
上輟朝臨奠諡曰莊靖改莊惠同母弟瓊本名桓篤爲人重
厚寡言內行修飾工詩精于騎射書藝女直大小字皆通同年
封崇國公加封瀛王章宗愛其性忠孝兄弟中最爲善人嘗令
在左右明昌三年未二旬薨帝三臨奠哭之慟敕葬事所須皆
從官給命工部侍郎胥持國等典喪事諡曰文敬瓊本名阿
憐母田氏早卒溫妃石抹氏養爲子大定二十五年封宿國公
進封沂王明昌四年爲趙王永功後六年溫妃薨上問所服禮

官張晔奏慈母服齊衰三年桐杖布冠禮也王爲近親至塋歷降與臣下不同乞於未葬以前服白布絹巾既葬止用素服終制朝會純吉上從其奏承安元年任兵部尚書改封蔡王四年除秘書監泰和五年賜名從彝八年改封霍王貞祐二年薨上輟朝琦本名吾里不母劉氏封茂儀琦封壽王承安元年郊恩進封英王四年改封瀛王同時賜名從憲明年授秘書監爲人風儀秀峙性寬厚善騎射待府僚以禮秩滿去者皆有贐帝尤愛重八年三月初以病聞上卽臨問賜錢五百萬還官詔府僚上其疾增損狀仍敕門司夜一鼓卽奏比五更重言之及薨上哭之慟爲輟朝臨奠者再諭旨判大膳親府事宛王永升言王家事叔宜規畫時二姬方孕若生子卽以付之以右宣徽使移刺都護其喪葬欵以內庫之服所須亦從官給諡曰敦懿

玠本名謀良虎母王氏封婉儀自幼穎秀性溫厚好學初封溫王薨年十一諡曰悼敏

庶長子永中本名實魯刺又名萬僧母元妃張氏父玄微母高氏與世宗母貞懿皇后葭莩親生永中而卒追封宸妃又贈惠妃永中初封許王判大興尹進封起與趙王拜樞密使遇明德皇后改葬坤厚陵元妃亦同陪葬發引之日永中以元妃柩先行使執黃繖者前導俄頃皇后柩出磐寧宮少府監張瑾言呼執繖者不應欲奏其事太子不較以爲繖人之誤乃止二十一年改判大宗正事心懷不悅太子復勸宗正之職自親及疎自近及遠此親賢之任且皇子之貴豈以官職開劇爲計耶永中乃喜及幸上京并留輔太子居守會遣石古乃奉表起居世宗喜語豫國公主言太子孝德天成先遣其二子繼遣此兒兄弟

相友愛如此及太子薨永中於諸子最長上召赴行在加開封儀同三司明年復爲樞密使賜諸孫名石古乃曰瑜神土門曰璋阿思懣曰玘阿離合懣曰瑒有司奏擬兼從上曰兒輩尚幼若奉承太過使傷心滋大卒難節抑諸兒毋入侍朕當其語笑娛樂之際必淵默莅之庶使知教戒之意遂不許二十七年玘與瑒俱年十五以上加光祿大夫奉國上將軍章宗卽位起復永中判西京留守進封漢王與諸弟各賜金五百兩銀五千兩錢二千貫重幣三百端絹二千匹再賜永中修公廨錢三百萬特加瑜銀青榮祿大夫及孝懿皇后崩吳王永成隋王永升奔喪後期各罰俸一月杖其長史五十永中適有寒疾不能至上怒頗意諸王有輕慢心遣使責永中曰已近公除亦不須來二月丙戌禪祭永中始至入臨辛卯始克行燒飯禮壬辰及諸王

朝辭賜遺留物又進封并王判平陽府事至鎬王上頗嫌忌諸王置王傅府尉名爲官屬實檢制之府尉希望風旨過爲苛細自分已老動有掣制情思鬱鬱不堪乃表乞閒居不許及永蹈以謀逆誅增置諸王司馬一員檢察門戶遇毬獵游宴皆有制限家人出入悉爲禁防河東提刑判官把里海坐私謁永中杖解其職前近侍局副使改西京留守同知裴滿可孫亦因受屬爲瑜求官免之母舅張汝弼妻高陀幹自元妃薨畫像奉之甚謹挾左道爲永中求福希覲非望坐以詛祝誅上疑事在永中會王傅尉奏珠因防禁嚴密語涉不道詔同簽大睦親府事膏中丞孫卽康鞠問并求得璋所撰詞曲有不遜語家奴德哥首永中嘗與侍妾瑞雪言我得天下以爾爲妃詔遣官覆按狀同再遣禮書張諱兵侍烏古論慶壽覆訊上詔宰臣鎬王祇因語

言與永蹈罪異參政馬琪曰若以人臣無將言則一也左相清臣亦言王素有妄想之心詔宣示罪狀百官雜議皆曰請論如律惟宮籍監丞盧利用乞貸之詔乃賜死璩與瑋皆棄市敕有司用國公禮收葬妻子威州安置泰和七年詔復王爵賜諡曰厲敕瑜等於威州擇地以禮改葬歲時祭奠貞祐二年復徙妻子鄭州三年太康縣盜劉全亡入衛真界詭托石古乃自稱愛王實無是封假以惑衆與同縣人時溫謀爲亂誘王氏女爲妻溫稱東平人李寧居嵩山有妖術可論大事使范元書僞號召之寧至推爲國師議僭立事覺諸人皆伏誅四年潼關破復徙子孫於南京興定二年譙縣人孫學究私造妖言云愛王終當奮發今匿迹民間自號劉二衛真百姓王深等皆信以爲然有劉二者出而當之遣歐榮輩結構逆黨市兵杖大署旌旗謀僭

立事覺被誅死五十二人緣坐六十餘人自此禁錮子孫幾四十年天興初始弛之

永蹈初名石狗兒大定初封滕王進徐王二十五年加開府儀同三司明年爲大興尹章宗卽位判彰德軍節度使進封衛王明昌二年徙封鄭王三年改判定武軍時元妃李氏方寵于上王乃長子有郭諫者妄言大王相貌非常王妃及二子皆大貴崔溫馬火初二人私論試記熟於天象溫言丑年有兵災屬免命者來春當收兵得位大初亦言昨見赤氣犯紫微白虹貫月皆主丑後寅前兵戈僭亂永蹈深信其說陰結內侍鄭兩兒伺上起居以溫爲謀主諫大初往來游說因妹韓國公主適河南統軍使僕散揆欲取其軍以爲助與妹澤國公主長樂謀使駙馬都尉蒲剌觀致書于揆且先請婚以觀其意揆拒却其婚使

者不復敢言家奴董壽知之以諫不聽同輩千家奴上變詔鞠問連引甚衆久不能決石相夾谷清臣奏曰事貴速絕以安人心乃賜永蹈及妃卞玉二子按春阿辛公主長樂皆死以財產分賜諸王財物分賜諸公主蒲刺覲崔溫郭諫馬太初等皆伏誅按以不豫聞祇坐除名董壽免死隸監籍千家奴賞錢二千貫特遷五官雜班敘使久之帝意頗悔泰和七年詔復王封備禮改葬賜諡曰刺

永功本名宋葛又名廣孫永中同母弟貞元二年生性沉默寡言笑勇健絕人涉獵書史好法書名壽大定四年封鄭王七年改封隋王十一年又進晉王十五年除刑部尚書上令學其舅汝霖爲政十七年授活活土世襲猛安十八年改大興尹世宗幸金蓮川怒親軍二蒼頭縱馬食民田詔令各杖一百彈壓二

百戶失覺察勒停永功奏親軍止一蒼頭兩彈壓服勤日久請
量決蒼頭償其田直憐察彈壓令其待罪上皆從之有老嫗因
失男婦告于伍長蹤跡之忽見一男子私殺牛手持血刃望見
伍長意其捕已卽行走避嫗與伍長疑是殺其婦也捕送縣不
勝楚毒遂誣服問尸安在詭曰棄之水中偶獲一尸已半腐信
以爲是卽具獄上永功疑之曰婦死幾何而尸遽半腐哉頃之
嫗果得其婦於男子所私者遂釋又發武清黃氏望雲汪氏豪
猾不逞劾正其罪畿內肅然二十三年判東京留守改河間尹
復爲北京留守凡七月改東京留守從世宗幸土京明年命護
皇太子喪事尋拜御史大夫章宗封原王兄弟皆加開府儀同
三司明年判太宗正事以與應州僧有舊爲囑事于彰國軍節
度使移剌胡剌事聞解職章宗卽位嘗免朝參除判平陽府進

封冀王濟南先帝舊治風土甚好改判其府復授山東西路把
魯古世襲猛安歷判廣寧彰德府事進封魯王承安元年又進
鄆王歷判太原中山府事衛紹王卽位進封譙王明年又進封
越從遷汴京詔每月朔一朝興定五年有疾賜御藥及尙醫診
視薨上哭之慟諡曰忠簡子福孫賜名璐壽孫名璿粘沒曷名
琳璿字仲實一字子瑜資質簡重博學有俊才喜爲詩工真
草書大定二十七年與璐俱爲奉國上將軍明昌初又同加銀
青榮祿大夫衛紹王進開府儀同三司貞祐中封胙國公正大
初進封密國公璐蕭國公爲興陵崇妃養子兄弟奉朝請泰和
五年璐卒輟朝百官進名奉慰璿日以講誦吟咏爲事與文士
趙秉文楊雲翼雷淵元好問李汾王飛伯輩交善南還得盡載
法書名畫居汴中家口多俸入少客至不能具酒餽蔬飯共食

焚香煮茗。盡出藏書。談大定明昌以來故事。樂而不厭。終日不聽客去。天興初。臥疾。論及時事。嘆曰。兵勢如此。已不能支。祇可納降。以全完顏一族。歸吾國中。使女直不滅。則善矣。餘復何望。見哀宗於隆德殿。相顧泣下。曰。近聞曹王欲出議和。其年尚幼。未經諳練。恐不能辦大事。臣請副之。或代其行。慰以比承平時。無事。置叔父冷地。無所顧藉。緩急則置于不測。叔父盡忠。固可。天下其謂朕何。乃罷。未幾。以疾薨。年六十一。平生詩文甚多。自選詩三百。樂府百。號如菴小藁。第五子守禧字慶之。風神秀徹。特所鍾愛。平日所蓄書畫。盡以付之。及汴城降。年未三十。病卒。永德本名訛。出大定二十七年。封薛王。明年除秘書監。又明年進封瀋王。明昌初。授山東東路把魯古必剌猛安。三年。進封曲王。五年。遷勸農使。承安二年。進封潞王。衛紹王立。累遷太子太

師宣宗卽位同判大睦親府事興定五年改判府事卒子幹論
賜名琰

永成本名鶴野昭儀梁氏所生風姿奇偉自幼喜讀書博學善
屬文世宗尤愛重之大定七年始封潛王以太學博士王彥潛
爲府文學令師事之十一年進封幽王十六年判秘書監明年
判大睦親府事授世襲中都路胡土窩哥蠻猛安二十年改授
翰林學士承旨二十三年判定武軍節度使事尋改判廣寧府
世宗幸上京命留守中都判吏部尚書爲御史大夫章宗卽位
起復進封吳王判真定府事明昌元年改山東西路益買必刺
猛安明年進封堯王坐率軍民圍獵以爲擾民解職就封奉表
謝罪上賜手詔戒之未幾授沁南軍節度使三年改判太原府
事誕日上親爲詩以賜有美譽自應輝玉牒忠誠不待啓金縢

之語當世榮之七年改判平陽府事永安元年覃恩進封豫王
明年當進馬八十疋以資守禦賜詔獎諭稱皇叔不名五年再
任俄召還以疾不能入見上親幸其第臨視泰和四年薨上爲
震悼賻贈甚厚購其遺文諡曰忠獻爲人夙有雋望晚年所學
益醇每暇日引文士相與切磋接之以禮未嘗見有驕色自號
樂善居士有文集行于世

永升本名斜不出母才人石抹氏大定十一年封徐與虞王二
十七年判吏部尚書授山東西路按必出虎必刺猛安章宗卽
位徙封隋王除定武軍節度使明昌二年改封曹王又改封宛
衛紹王徙夔王宣宗時年高羸疾詔宮中聽扶杖尋薨旣殯燒
飯上親臨奠

衛紹王六子大定二十六年賜名猛安曰琚按出曰瑄按辰曰

璪泰和七年命出繼鄭王永蹈後下詔朕念鄭王自棄天常以
于國憲葬葬曠野忽諸不祀歷歲既久深用愴然親親之情有
懷難置稽考古禮以衛王子按展爲永蹈後謹奉祭祀卿其念
之大安元年封六子皆爲王惟從恪胙王有考餘任王鞏王弗
傳是歲從恪爲左丞相二年八月立爲皇太子至寧末與后徒
單氏俱削名號廢居中都貞祐二年與鄆厲王皆徙鄭州禁其
出入婚嫁四年又徙南京凡禁錮二十餘年天興元年方弛其
禁後惟立冊爲梁王汴京破死焉

宣宗請子長名守忠母名氏不可考胡沙虎既廢衛王宣宗尚
未至卽迎守忠入居東宮卽位立母爲后自王氏姊妹入宮后
寵遂衰尋爲尼守忠爲皇太子冊禮待邊事稍息然後舉行本
年十月己未以鎮國上將軍太子少保阿魯罕爲太子少師上

遺諭旨時方艱難朕宮中每事裁減汝亦宜知斟酌樽節東宮無用者宜出之汝讀書人朕特用之遷汴留守中京至七月復召至三年正月薨上數臨奠殯所有司奏辰日不哭上曰父子至親何可拘忌四月葬迎朔門外五里諡莊獻五月立其子鏐爲皇太孫二歲薨賜諡冲懷太孫

次守純本名盤都貞祐元年封濮王皇女溫國公主二年爲殿前都點檢兼侍衛親軍都指揮使權都元帥上諭帥府濮王年幼公事殊未諳卿等毋以朕子不相規戒宜令凡見將校可謙和接遇三年爲樞密使四年拜平章政事奏知管差除令史梁繼誤書運副張正倫宣命乞治罪上曰令史有犯宰臣自當治之何必關朕興定元年進封英王授世襲東平府路三屯猛安上以監察御史程震言戒諭守純始吾以汝爲相者庶幾相輔

不至爲人譏病耳汝乃惟飲酒耽樂公事慢不加省吾嘗聞人言已過雖自省無之亦未敢容易去懷今諸相皆老臣每事與之商畧使無貽物議足矣四年九月守純欲發丞相高琪罪密召知案蒲鮮石魯刺令史蒲察胡魯具外郎王阿里謀之囑令勿泄諸人反告都事僕散奴失不以白高琪及琪伏誅劾奴失不處死石魯刺胡魯各杖勒停哀宗卽位追封荆王平章政事改判睦親府封母麗氏荆國太妃有告守純謀爲不軌下獄推問皇太后言于帝獲免所生三子長曰訛可封肅國公次曰李德封華王又次戴王天興初守純府第產肉芝一株高五寸許色紅鮮可愛旣而枝葉津流濡地成血臭不可聞剗去復生者再夜則房榻間羣狐號鳴秉燭逐捕復失所在踰年崔立亂遂及諸宗室皆死青城訛可初封荆王改曹王天興元年元兵

北行留速不解攻城攻具已辦議王將出質且退癸卯立攻具
沿濠列木柵驅漢俘及婦女老幼負薪草填壕頃刻平者大半
主兵者以議和之故不敢與戰但於城上坐視上從六七騎出
端門至舟橋人聞車駕忽出老幼遮擁驚愕失措咸詭道傍并
跪拜時新雨泥濘至有誤觸御衣者上手麾勿拜恐泥污汝衣
倉皇中市肆米豆狼藉於地亦令衛士收還各家俄頃宰相從
官皆至進筵不受曰軍士暴露我何用此所過輒加慰勞皆踴
躍呼萬歲咸願出戰死無所恨平章傳令勿放一鎗恐壞和事
上顧謂其中長者云朕爲生靈稱臣進奉無不從願止有一子
尚未成長今往作質子矣汝等畧忍待曹王出大兵不退死戰
未晚復有拜泣者曰事急矣聖主毋望和事乃傳旨城上放箭
西水門千戶劉壽控御馬仰視曰聖主無信賊臣賊臣盡大兵

退矣衛士欲擊之上止勿問是日曹王出詣軍前大兵併力進攻甲辰上復出撫東門將士以內府金帛自隨待賞有功太學生楊奐等前白臣等皆朝廷作養令執砲夫之役恐非國家百年以來待士之意敕記姓名卽免其役過南薰門值被創者親傳以藥手酌卮酒以賜乙巳鳳翔府砲軍萬戶王阿璽樊裔來歸取宋太湖靈壁假山石造砲小大各有斤重圓如燈毬有不中度者杖其工人大兵用砲祇破大礮或用碌礮爲二三攢竹砲有至十三稍者餘砲稱是每城一角置砲百餘枝更遞上下晝夜不息不數日石幾與裏城平而城上樓櫓皆故宮及芳華玉谿所折合抱大木隨擊而碎護以馬糞麥秸細索旃褥其懸風板外又障以牛皮隨卽延燒不可撲救惟城乃周世宗取虎牢土所築堅硬如鐵砲所擊處惟凹而已大兵壕外築圍百五

十里亦有乳口樓櫓壕深濶皆丈許初白撒命築門外短牆委曲陘隘祇容二三人過以防大兵奔門及是諸將請乘夜斫營比出已爲北兵所覺又募死士千餘穴城渡壕燒其砲宰執坐城上懸紅紙燈爲應約燈起渡壕亦爲圍者所覺又放紙鳶以誘被俘者所爲皆兒戲右丞世稱又命效先時河朔作江一曲使城上人靜夜唱之以寄謠吟之思其謬計如此後不知所終

弘簡錄卷二百二十六

明刑部員外郎仁和弘濟邵經邦學

皇清翰林院侍講學士四世孫遠平校閱

載記 金內族六

婁室

子活汝謀衍石古乃族子海里

銀木可

子毅英弟麻吉拔離達從子沃爾

習古迺

孫襄附王淫思烈

胡實改

阿魯捷懶

蒲盧火

子吾札忽附神土德

撒改

吾母

阿里刺三寶崇成阿喜

婁室字幹里衍父白蒼為完顏部七水諸部長太祖克寧江州

使婁室招諭係遼籍女直遂降移嫩益海路太尊照撒等敗遼

兵于婆刺趕山復擒兩將軍降益改捺末懶兩路進克咸州諸

部相繼來降復獲遼北係籍女直值都統耶律訛里朵衆二十

餘萬戍達魯古城與銀木可縱兵衝其中堅凡九陷陣皆力戰

而出復與銀朮可戍邊及九百奚營等部來降又同攻黃龍府
耶以完顏渾熱婆盧火石古乃兵四千敗遼兵萬餘于白馬濼
宗雄等下金山縣又使分兵二千招沿山逃散之人與幹魯古
破耶律捏里軍于蒺藜山取顯州請於太祖謂黃龍府一大都
會且僻遠苟有變易與隣郡相扇而起太祖然之命以所部合
諸路謀克爲萬戶屯守其地再進都統從杲取中京與于活女
從宗翰襲奚王霞末活女兵三百敗敵二千降奚部西節度訛
里刺追遼主至白水濼獲其內庫寶物與閼母攻破西京夏人
救遼兵次天德候兵突撚補斡二百騎敗沒阿土罕復以二百
騎往遇伏獨自脫歸時久雨諸將欲且休息奮語吾兵再破若
不復往彼將以我爲怯亟選千騎與弟拔離速及習失往幹魯
壯其言從之妻室遲明出陵野嶺留收離速兵二百據險守之

獲生口聞其帥李良輔將至登高望之夏人方濟水爲陣恃衆不整使人速報韓魯婁室乃分軍爲二更迭出入轉戰三十里過宜水與幹魯合擊敗之又與照里馬和尚生獲遼都統大石於奉聖州龍門東二十五里悉降其衆守臣闕里刺乘州城遼去又與宗望追遼帝敗其三千軍于三山有千人將趨奉聖州復與蒲察擒其主帥而還夏人屯可敦館宗翰遣往戍朔州築城於霸德山西南二十里遂破朔州西山兵二萬擒其帥趙公直以獲遼帝于余都谷賜鐵券銀木可圍太原宋統制劉臻率衆十萬來救出壽陽破之繼敗榆次兵數千宋張灝軍出汾州拔離速達走之灝復營文水再與突葛速拔離連大敗之取汾石二州及其屬縣溫泉方山離石蒲察降壽陽取平定軍及樂平復招降遼州及榆社遼山和順諸縣遂自平陽先趨河南破

宋步兵於孔子廟南遂降河陽取假師末安軍降鞏縣撒剌答
敗宋兵於汜水降滎陽滎澤鄭州中牟又遣率師趨陝津攻河
東未下郡縣阿離土罕敗敵于河上撒按敗敵于陝城下憐沙
虎降虢州守陴卒三百人遂克陝府習古乃桑袞破陝之散卒
于平陸西北婁室破蒲解軍二萬盡覆之安邑解州皆降遂克
河中府降絳慈隰石等州又使取陝西敗宋將范致虛軍下同
華二州克京兆府獲宋制使傅亮遂克鳳翔康王命蒲察專事
陝西以婆盧火繩果監戰遇敵於蒲城及同州臨真皆破之進
克丹州延安府遂降綏德軍及靜邊懷遠等城寨十六復破青
澗城宋安撫使折可求以麟府豐三州及晉寧所部九寨皆降
惟晉寧軍久不下規其城中無井以取河水爲飲東決其渠泄
之城中始困殺守將徐徽言遂降定安堡渭平寨及郝坊二州

詔以契室婆盧火守延安折可求屯綏德蒲察還守蒲州延安
鄜坊皆殘破人民存者無幾爲置官府輯安之別將幹論降與
阿盧補謀里也至三原建昌軍復叛討平之進兵降乾州克那
州軍于京兆所降城邑多叛上以爲倦于兵命宗輔代之與張
浚戰于富平會宗弼左翼軍已却妻室力疾以右翼鏖戰遂破
巨敵宗輔稱其力徇王事雖古名將何以加之輟所川犀玉金
銀器及甲冑并馬七匹與之天會八年十二月丁丑薨贈太子
太師泰寧軍節度使兼侍中皇統元年加贈開府儀同三司追
封莘王正隆例改金源郡王配享太宗廟庭諡莊義 活女年
十七從攻寧江州力戰創甚扶出陣間太祖憑高望見知之撫
慰賜藥歎以他日必爲名將攻濟州敗敵八千復戰信州移刺
本陷敵陣力戰出之敵遂北又敗耶律佛頂等兵于瀋州從攻

乙室部破其二營。迭刺部族叛。率三謀克突入大破之。從圍太
原。朱將种師中援兵十萬出井陘。敗之于殺熊嶺。斬師中于陣。
大軍至河。無船不得渡。父遣率兵三百循水上下。自孟津而南。
度其可渡。引以先。濟大軍皆隨之。朱將郭京出兵數萬趨父營。
活女從旁奮擊。衆亂。遂破之。師還。復破敵於平陸。渡得其船。以
濟。又捷於張店。原時屯留。太平翼城皆有重敵。並破之。又分兵
取陝西蒲州。降卽留鎮之。攻鳳翔。先登。宗輔定陝西。以爲都統。
進攻涇州。敗王開山。以兵拒歸路。邀戰。再擊敗之。遂降京兆鳳
翔諸縣。襲父合扎猛安。代爲黃龍府路萬戶。天眷三年爲元帥。
右都監。遷左監軍府。罷改安化軍節度使。歷京兆尹。封廣平郡
王。正隆例改封代國公。進隋國公。卒年六十一。諡貞濟。次子
謀衍。勇力過人。善用長矛。突戰天眷間。克牌印。祇候。授顯武將。

軍擢符寶郎皇統四年其兄讓以親管與吉猛安俄植濟州路萬戶八年爲元帥右都監天德三年授順天軍節度使歷河間臨潢尹數月改婆速路兵馬都總管往討撒八遇世宗于常安縣盡以甲士付之。因率諸將吏民勸進卽位拜右副元帥命伐白彥敬志寧於北京遇其衆于建州之境皆不肯戰二人遂降會討窩幹屯兵懿州慶雲縣及川州武平縣奏請糧運并護送兵仗詔以南征逃還軍士就往如不足量於富家簽調率諸軍將會濟州時賊新敗于泰州獲其謀者知敵將由別路邀糧運遂分軍往迎之以貪鹵掠不復追敵得縱去上聞之下詔切責朕委卿等討賊乃聞不就賊趨戰而駐兵閑緩經涉累月雖會追襲不由有水草之地以致馬足疲弱不能百里而還後雖破賊又縱諸軍劫掠數日後方追北霧縈河輒復引還朕欲重譴

以方任兵事且圖後功常盡心一力毋得似前怠弛其子斜哥
暴橫軍中勒歸本貫謀衍至京師以同判太宗正事未幾速頻
路軍士木里古告斜哥寄書與謀衍謀反世宗察其誣詔勒告
者誅木里古仍召謀衍面諭宜悉朕意上初慮窩斡方熾使溫
迪罕阿魯帶因妻生日旣離軍中賊衆聞之來襲殺傷士衆遂
坐除名詔謀衍蒲察烏里雅蒲察通引兵三千擊之擒賊黨猛
安合住未幾窩斡平乃還大定七年上因其故老欲均勞逸出
爲北京留守御便殿賜食及御服衣帶佩刀尋改守東京封榮
國公十一年薨年六十四爲人性忠厚善擊毬射獵時論以爲
雖智養不及其父而勇敢肖之 又次石古乃名仲體貌魁偉
通女直契丹漢字幹魯愛其才欲使通吏事每視事常令在左
右遇事輒問之應對如響嘆以必爲令器皇統初克護衛授世

契謀克天德元年攝其兄濟州萬戶部內稱治除濱州刺史母憂起復知積石軍事轉河南尹同知正隆伐宋爲神勇軍副都總管還除大興尹同知將兵二千以脩契丹還西南路招討使兼天德軍節度使政尚忠信決獄公平蕃部不敢寇邊名爲左副都點檢宿衛嚴謹小心畏慎每事有規矩後來者守其法莫能易世宗常語侍臣遇仲入直朕寢益安五年宋人請和爲報問使請與宋主相見禮儀諭以親起立接書則授之及至遂一如禮上嘉之轉都點檢兼侍衛親軍都指揮使遷河南路統軍使諭以江淮重地益宜勉之賜廐馬金帶玉吐鵲復有罪解職久之起爲西北路招討使改北京留守卒族子海里體貌豐偉善用稍從婁室爲黃龍府萬戶徙於執吉訛毋復從迨及遼主於朔州阿敦山婁室遣與朮得往見遼主諭之使降時已窮

蹙待於阿敦山東婁室因獲之賞金銀幣帛錦絹宗輔經畧陝西戰却吳玠軍於涇邠之南尋遣修棧道宋人以兵來拒破之又賞銀百五十兩奴婢十人天眷元年擢宿直將軍與定宗磐宗尙之亂遷廣威將軍除都水使者改西北路招討都監歷復灤二州刺史耶盧梳群牧使迭刺部族節度使同知大興尹兼中都路兵馬都總管改武寧軍節度使終廣寧尹年六十二銀术可常太宗嗣位以取阿朮事久不決使與習古迺繼往還言遼主荒于政事上下解體有可取之狀太祖信二人言自此決意伐遼從戰達魯古城破遼兵二十餘萬語成見婁室傳收國二年分鴨撻阿懶所遷二千戶以爲謀克屯寧江州遼大冊使習泥烈遣回約以七月半至盡九月未來上使諸軍過江獲遼邊吏乙薛所使曳刺麻荅十三人兵士八人縱火於渾河以

絕芻牧太祖命釋之俄從都統杲克中京與習古迺蒲察胡巴
魯率兵三千擊奚王霞末于京西七十里霞末棄兵逃遼主西
奔天德銀术可以兵絕其後遂見獲後從宗翰伐宋圍太原未
下命留兵守其圍宋樊夔施詵高豐等軍來救太原分據近郡
銀术可與習失盃魯完速大破之索里乙室破宋兵近縣已降
援兵復入據太谷和縣阿鶻懶投離速仍拔取之預攻种師中
使幹論破其軍撒里土又敗宋軍於回馬口太原已定復攻克
汴城師還降岢嵐寧化等軍拔嵐州招降火山軍賜鐵券又取
鄧州殺其將李操等擒轉運使劉吉鄧州通判王彬宗翰會伐
康王使獨守太原天會十年爲燕京留守十三年致仕加保大
軍節度使同中書門下平章事遷中書令封蜀王天眷三年四
月癸丑薨年六十八正隆例改金源郡王配饗太宗廟庭大定

十五年諡武襄改配享太祖廟庭弟麻吉拔离速子毅英本名撻懶幼警敏有志膽初邕角太祖見而奇之年十六授世襲謀克從父伐遼爲先鋒伐宋守太原圍皆在行間屢有功宋兵數萬來救至南關父叔與婁室等擊之當隘巷一卒揮刀向拔离速毅英以刀斷其腕又一卒從旁刺之復斷其槍追殺之拔太原下河東諸州攻汴京皆有功與都統馬五狗地漢上至上蔡以先鋒破孔家軍宗輔攻開州毅英先登流矢中其口創未愈復強起攻大名府第功次于宗弼攻東平功居最拔離速襲宋楊州以爲先鋒又追孟后前行趨潭州宋兵駐常武選卒薄其城敗千餘人城中出兵來戰又敗之獲馬二百匹遂攻常武拔离速諸軍爲大陣居其後毅英以五百騎爲小陣前行馳宋軍宋軍亂遂大敗之其周旋進退皆有法則拔离速嘆賞之後

因河東郡縣多叛命以先鋒攻克絳川復攻沁州飛砲擊其右脅昇歸營中諸軍攻沁三日不能下骨城強起指麾士卒遂克之遷攝河東路都統從左監軍移刺余睹招西北諸部將騎三千五百平其九部獲生口三千馬牛羊十五萬又以先鋒破宋吳山軍再戰再勝斬之于隘死者不可勝計宋兵遞去宗弼再取和尚原仍以本部破宋五萬人奪新义口留兵守之是夜大雪道路皆冰宋兵勢重不可徑取宋弼用其策自傍近高山叢薄間入出其不意遂取和尚原請速入大散關宗弼止之殺英先攻仙人關不止宗弼以刀背擊其兜鑿使之退謂敵氣已沮不乘此而取後必悔之已而果然宗弼嘆曰既往不咎乃班師復爲後殿以備伏兵且戰且却遂達秦中齊國初廢命撒离喝撫治諸郡至同州故齊觀察使李世輔出迎陽稱隆馬折臂昇

歸伺方入城詐使通判獻甲鴈事。隨以壯士十人。世輔自壁後突出。執撒离喝。變起倉卒。殺英方索馬于外。不得入。城門已閉。至東門。遇合荅雅領騎三十餘。與斬門者而入。世輔擁衆自西門出。二人合襲之一。進一退以綴。世輔慮救兵至。反要撒离喝與之盟。勿使追之。殺英聞撒离喝聲。與騎而歸。除安遠大將軍。攝太原尹。四境咸治。兼攝河東南北兩路兵馬都總管。會復取河南陝西地。師至耀州。宋人每旦出城張旗閱隊。抵暮而還。道隘。騎不得逞。殺英請兵五百。伏山谷間。薄暮先使五十人趨山麓。令旦日視城中人出。聞舉旗伏兵發。宋兵爭馳入城。殺英麾軍登城。拔宋幟立金旗幟。宋兵內外望見皆降。宋吳玠擁重兵據涇州。涇原以西多應之。撒离喝欲退守京兆。俟河南河東軍勦以我若退守玠必取鳳翔京兆。同華據潼關。吾屬無類矣。不

如速戰我軍陣涇之南原宋兵必自西原來吾與斜補各以選騎五百摧其兩翼使拔离速當其中元帥據岡阜多張旗幟爲疑兵可以得志從之玠兵果自西原來二將擊其左右自旦至午玠軍少退拔离速當其前衝擊之遂敗玠軍偪尸枕藉大澗皆滿自此蜀人喪氣不敢復出關陝遂定歷行臺吏工二部侍郎從宗弼巡邊遷刑部尚書轉元帥左都監天德二年遷右監軍府罷改山西路統軍使領西南西北兩路招討使坐無功降臨海軍節度使歷平陽大原尹正隆末爲中都留守兼西北面都統討契丹撤八駐軍歸化州世宗卽位使其姪阿魯瓦特詔拜爲左副元帥就宣大定改元赦于西南西北招討司調河東河北山東諸路州鎮猛安軍屯京畿殺英猶豫未決士卒皆欲歸附乃不得已受詔下令諸路亟泥馬槽二萬具然後遣人宣

赦諸路聞之。以爲大軍且至。故皆聽命。元年十一月以軍至中
都。同知留守璋請至府議事。疑其有謀。陽爲許諾。寧騎竟從施
仁門出。駐兵通州。見世宗于三河。詔以便宜規措河南陝西山
東邊事。二年至南京。復汝潁嵩等州。縣授世襲猛安。頗恃宿將
功。漬貨不恤軍民。詔使問邊事。不荅。謂爾解何事待我。到闕奏
陳。及拜平章政事。多自專。已所欲輒奏行之。罷爲東京留守。忿
怒不接賓客。雖貴近亦然。改濟南尹。上數以朕念卿父子咸有
大功。故授此職。卿宜知之。若復不悛。非但不保官爵。身亦不能
保也。頓首而謝。久之。改平陽尹。致仕。起爲西京留守。母憂起。復
仍守東京。帝以上京王業所起。風俗日偷。宗室聚居。號爲難治。
卿元老大臣衆所聽服。以爲留守。當正風俗。檢制宗室。持以大
體。十五年致仕。居北京。會脩太廟。兩朝實錄。當時舊人親見者。

惟毅英在詔脩煥溫廸罕締遠就其家問之多所更定十九年
薨年七十四 麻吉年十五隸軍中從破高麗兵下寧江州平
係遼女直克黃龍府皆身先力戰以功爲謀克繼領猛安又破
奚兵千餘從幹魯古攻下咸信濬州及東京諸城皆有功都統
杲取中京與稍合胡拾荅別降楚里廸部屯兵高州以兵援蒙
剌孛董大破敵兵復敗恩州兵五萬人討平遼人聚中京山谷
者降三千有餘戰于高州境上伏矢射之中目遂卒凡經大小
三十餘戰所至皆捷皇統中贈銀青光祿大夫諡毅敏 子沃
側年十七隸軍中從拔剌速擊遼將馬五敗之父死領職從宗
望伐宋至河上宋兵屯于河外以二舟來伺我師遣率勇士數
輩以一舟往迎盡俘以還又從襲唐王於江淮師還駐東平及
廢齊屯兵河北招降旁近諸營多獲畜產兵仗軍帥嘉之賞以

甲馬從攻陝西爲右翼都統攻城破敵皆與有功師還正授謀克遷華州防禦使屬關中歲饑盜賊充斥募兵討平之部以無事郡人列狀丐留不報未幾除迪列部族節度使改迭刺部薦舉廉能八爲都水使者秩滿同知燕京留守事爲西北路招討使以發撒八秩滿冒俸不卽解去撒八反遂遇害 拔离速天輔六年宗翰在北安州將會斜也于奚王嶺遼兵奄至古北口使蒲盧火將兵二百擊之渾黜亦將二百兵爲後援渾黜聞知遼兵多請濟師宗翰欲自往希尹婁室曰此小寇易與耳請以千人爲公破之渾黜至古北口遇游兵迂入山谷遼步騎萬餘迫戰死者數人渾黜退據關口希尹婁室至拔离速訛謀罕胡實海填鋒奮擊大破之斬馘甚衆盡獲甲冑輜重希尹與撒里古獨裴滿突然敗其伏兵殺千餘人獲馬百餘匹遂與宗翰至

奚王嶺期會于羊城灤俱見前傳天會四年克太原以爲管勾
太原府路兵馬事與婁室敗宋兵于文水遂從宗翰圍汴與銀
术可畧地襄鄧入均州還攻唐蔡陳三州皆破之克潁昌府復
與秦欲馬五襲宋康王于揚州天會十五年遷元帥左都監宗
勣再定河南撤離喝經畧陝西至涇州拔離速大破宋軍于渭
州渭與德順軍皆降陝西平遷元帥左監軍加金吾衛上將軍
卒諡敏定

習古迺亦作實古迺昭祖之孫從太祖拒遼兵使與銀术可鎮
守達魯古城及取居庸關使往追蕭妃不及久之爲臨潢府軍
帥討平迭刺其羣官率衆降者請使就領諸部太宗賜以空名
宣頭及銀牌俾以便宣授之獲遼許王莎遜駙馬蕭乙辛始知
遼梁王在紇里木并雅里自立於是徙遼降人於泰州習古迺

言時暑未可徙請姑處之嶺西詔築新城於契丹周特城置之
朝命因平州烏虎里部人迪烈剌沙率部族降以撻僕野爲本
部節度使烏虎爲都監習古迺封還宜誥以便宜各授散官填
空名告身付之轉錄降附有勞故官八百九十三人加迪烈防
禦使爲本部節度使剌沙諸司使爲節度副使知迪烈底部事
撻離答加左金吾衛上將軍知突鞠部事阿杲加觀察使其餘
遷授有差朝廷從之仍以龐葛城地分賜烏虎里迪烈底二部
及契丹人其未墾者聽任力古射天輔六年領咸州烟火事天
會十年改南京路軍帥司東南路都統司各爲都統移治東京
鎮高麗授上京世襲猛安終東京留守弟胡實改子阿魯帶皇
統初北伐有功拜叅知政事 孫襄俗名噍幼有志節善騎射
多勇畧年十八襲爵大定初以本部兵從謀衍討契丹窩幹戰

于肇州之長湫。襄先登。擊七戰皆勝。足中流矢。襄創而固。奮氣愈厲。謀衍握其手曰。今日之捷。皆公力也。賊走渡。霽松河。迫及之所駐地。多草。賊乘風縱火。襄立空地。以俟。戰十餘合。賊益困。襄勸謀衍。今不飛此平殄。後將有悔。謀衍不從。已乃復從。僕散忠義追賊至陷泉。率右翼身先奮擊。賊大潰。人馬相蹂而死。論功第一。特授亳州防禦使。時年二十三。宋人祀南都。襄爲潁。壽都統率甲士二千渡潁水。敗敵兵五千。復潁州。生擒宋帥楊思次。潁州朱將郭太尉退保橫澗山。伏弩中其膝。督攻愈急。竟拔潁州。獲郭太尉。旣而趨滁州。襄爲先鋒。將至清流關。得宋偵者。知敵欲三道夜出掩我。不備。元帥志寧問計。襄曰。今兵少。地隘。儻不得關。敵至我無所據。必先取之。又問我與若孰往。襄曰。元帥國家大臣。詎宜輕動。襄當爲公往取。志寧避之。襄分兵爲

二道一由衝路自引千兵間道潛登既近清流敵始覺襲攻克之據其關志寧履行戰地顧謂曰克敵於不可勝之地真天下英傑也及朱乞盟班師召爲拱衛直都指揮使改殿前右衛將軍轉左衛出爲東北路招討都監遷速頻路節度使移曷愼路兵馬都總管在外任治有異効會志寧疾甚世宗臨問薦襄智勇兼濟有經世才他人莫及異時任用殆勝于臣卽召授殿前左副都總檢使朱賀主生辰朱方祈免親接國書折其來議成禮而還累改陝西河南兩路統軍使賜尚服腕馬鞍勒佩刀經制邊事甚有統紀入爲吏部尚書奏公守法轉都點檢賜錢千萬上語宰執稱其蘊藉難得遇非直日亦入宮規畫諸事乃退其公勤如此擢爲御史大夫以剛直聞踰月拜尚書右丞委以政機未幾進左丞朝廷以褒賞廉吏詔天下列其名以示獎勵

二十三年拜平章政事封蕭國公皇孫將加王爵詔釋國號襄
曰爲天下大計必先正其本原者本也請封原從之故事諸部
族節度使多用乂人爲僚屬頗私縱不法議改用諸色人襄曰
北邊雖無事恒須經畧若杜此門後有勞績何以處之請如舊
便又議及監軍之事漢唐初無將得專任故嘗戰勝攻克叔世
始監以內臣動爲所制及敗多而功少若將得其人監軍誠不
必置並嘉納之詔授北部進貢使還帝問邊事具圖以進因上
羈縻屬部鎮服大石之策詔悉行之進拜右丞相徙封戴國公
世宗不豫令宿內殿同受顧命章宗初政議罷僧道奴婢襄奏
出家之人安用僕隸其寺觀物力元係奴婢之數並合除免詔
從襄言由是二稅戶悉放爲良明昌元年坐膏上封事歷詆宰
執克寧奏襄預知所言出知平陽府鳳翔歷西京留守同判大

睦親府事進樞密使復拜右相改封任國公屬邊事急命代清
臣將佩金牌便宜從事臨宴慰遣賜以貂裘安山紉鎧及戰馬
二時胡兀兒亦叛嘯聚北京遣人招降之遂屯臨潢項之出師
大鹽澤復遣右衛將軍完顏充進軍幹魯速城欲屯守俟隙進
兵繪圖以聞密詔進討襄山西道支軍出東道至龍駒河爲阻
糗所困求援甚急卽鳴鼓夜發衝晨歷敵突擊之圍中將士亦
鼓譟出戰獲輿帳牛羊衆皆奔斡里札河遣完顏安國追蹙之
衆散走會大雨凍死十八九降其部長遂勒勲九峯石壁捷聞
上遣使厚賜撫勞賞資士卒九月赴關轉左丞相監脩國史封
常山郡王宴慶和殿上親舉酒解所服玉具佩刀以賜俾卽服
之十月阻鞏復叛襄山屯北京至石門鎮密語僚屬此奚足慮
第恐姦人乘隙而動北京近地軍少當預爲備卽遣官發上京

等軍六千適羣收契丹德壽隨鎖等據信州叛僞建年號衆數十萬遠近震駭果得其用襄因有備閑暇如平日人心乃安命臨潢總管烏古論道遠咸平總管蒲察守純分道進討擒德壽等送京師上遣問廷臣因亂議罷郊祀對以大禮不可輕廢請決行之臣計於祀前滅賊及是果如所料禮成進封南陽郡王上復許以承制除授辭言賞罰之柄非人臣所預不敢奉詔賊平請委近臣諭旨將士使知上恩乃遣李仁惠持白龍虎衛上將軍節度使以下宣三十勅百五十視功給之諸虜有剽畧爲民患者慮其與德壽合移居近京地或謂恐生變笑曰虜雖雜類亦我之邊民若撫以恩焉能無感後果無患尋詔參政裔代領其軍入見賜錢五十萬內艱起復視事時議契丹戶驅奴尚衆乞盡鬻以散其黨襄奏其非便請量存口數餘悉官贖爲良

從之北部復叛裔戰失律仍命爲左副元帥蒞師尋拜樞密使兼平章政事屯北京議民艱食減價出糶倉粟民大悅服時議北討奏遣宗浩出泰州夾谷衡山西北路以邀阻犍而自帥兵出臨潢上從其策賜內庫物卽軍中用之其後斜出部族詣撫州降賜以寶劔專使臨問襄謂受之便詔度空窮討令士自資糧以省輓運進屯于沔移刺烈烏滿掃等山以逼之因請就用步卒穿塚築障起臨潢左界北京路以爲阻塞言者多異同復問方畧襄曰茲費雖百萬貫然功成之後邊防完固戍兵可減民力轉輸因以少寬實爲末利命親督視會歲饑募充以備五旬而畢西北西南路亦如之無何泰州軍與敵接戰宗浩督其後殺獲過半諸部相率送款襄納之自是北陲遂定還軍臨潢減屯兵四萬馬二萬匹召以信符遣近臣迎勞于途復至第撫

問入獻邊機十事皆爲施行仍厚賜之復拜左丞相遣左司郎中阿勒根阿海降詔褒諭四年正月進拜司空素重厚寡言專務鎮靜守法每掾有所稟必問諸相云何掾對某相議如是旣而從之其事無有異者識者謂襄誠得相體朝議設清閑職位如宋朝宮觀使以待年高致仕者襄言朝廷養以俸廩恩禮優渥至老不退復有省會之法所以抑貪冒長廉節若擬別設恐涉于濫上表待罪上召翰林學士党懷英草詔罪已仍慰諭襄等視事泰和元年春永命馳禱于亳州太清宮及后土方嶽以其世封遠特改授河間府路葬本海猛安明年皇子生襄復自請報謝嵩嶽還次芝田之府店以疾薨年六十三訃聞輟朝遣使路祭葬依克寧禮諡曰武昭命張行簡銘其碑生平明敏才武過人所至有功臨潢駐軍有以僞書遺走單鎰欲構以罪書

聞上還界之其親信如此既而果獲爲僞書者在政府二十年
明練故事簡重能斷器局尤寬大待下吏盡禮川人各得所長
爲當世明將相大安間配享章宗廟庭 子思烈資性詳雅頗
知書史自五六歲入宮充奉御甚見寵幸號白在奉御常宣宗
入承大統胡沙虎跋扈時尚髻亂嘗涕泣跪抱帝膝願早誅權
臣以靖王室帝急顧左右掩其口自是甚器重之後由提點近
侍局遷都點檢天興元年汴京被圍哀宗命樞鄧州行省參知
政事以王渥爲左右司員外郎從行會武仙引兵入援與思烈
論議不合仙以思烈方得君每假借之思烈謂仙本無入援意
特以朝廷遣一參政召兵迫於不得已乃行耳渥勸曰仙大小
數百戰經涉不爲不多兵事當共議思烈疑其與仙有謀幾斬
之渥自以無愧於內不爲之懼已而率諸軍發自汝州過密縣

遇元兵不用武仙阻澗之策遂敗渥死于陣中京留守任守貞亦死上聞罷思烈行省以爲中京留守自留山嶺軍民十餘萬赴之無何大兵圍中京未能下崔立遣人監思烈子于東門下脅使招降思烈不顧令軍士射之旣而知崔立已將汴京歸順患疾數日而死 渥字仲澤太原人性明俊不羈博學善談論工尺牘字畫清美有晉人風少游太學長於詞賦登興定二年進士爲時帥與屯邦獻完顏斜烈所知故多在兵間後辟寧陵令有治蹟入爲尚書省令史因使宋至楊州應對敏給宋人重之還爲太學助教轉密院經歷俄遷右司都事稍見信用

胡石改亦宗室子與阿魯俱從太祖攻寧江州臨潢府戰達魯古城破遼主親兵皆有功遼軍來援齊州與其兄實古乃以兵迎擊敗之還攻濟州中流矢戰益力克其城軍中稱其勇從攻

春秦州降之并降境內諸部族其不降者皆攻拔之追遯主至中京獲其宮人輜重凡八百兩有思泥古部族復叛去追以兵五百及之獲其親屬部人以還德州復叛引兵五千克其城又從婁室擊敗敵兵二萬於歸化之南并降歸化取居庸關并燕屬縣及其山谷諸屯移失部既降復叛去引兵追及戰敗之俘獲甚衆澤州諸部有逃者皆追復之又敗叛人於臨潢誅其首領安撫其民天眷二年遷永定軍節度使改武定軍徙汴京留守天德三年授世襲猛安卒年六十八阿魯名宗賢太宗監國選侍左右甚見親信臨潢又叛從宗望復取之爲內庫都提點再遷歸德軍節度使政尚寬簡境內大治秋滿士民數千詣闕請留改武定永定二軍百姓皆扶老携幼送數十里悲號而去秉德廉訪官吏士民持盆水與鏡前拜言曰使君廉明清直

類此民實賴之。秉德曰：吾聞郡僚廉能如一汝等，以爲如何？衆對曰：公勤清儉，皆法則於使君耳。因謂宗賢曰：人謂君善治，當在甲乙。果然賢使君也。用是超遷兩階。天德初，授世襲謀克。馳驛召之。雄州父老相率張青繩懸明鏡於公署，老幼填門三日，乃得去。封定國公，再除忠順軍，賜以玉帶，捕盜司執數人至獄，已具再閱案察其有寃不數日。賊果得人，以爲神明。改曷懶路兵馬都總管，歷廣寧尹，封廣平郡王。改節崇義軍，兼領北京宗室事。正隆例奪王爵，加金紫光祿大夫。又改臨海軍。大定初，率諸宗室見於遼陽，除同簽。大宗正事，封景國公。致仕起爲婆速路兵馬都總管，復致仕卒。撻懶年十六事太祖，未嘗去左右。出河店之役，太祖欲親戰，控其馬止之曰：主君何爲輕敵？臣請效力。卽挺槍前，手殺七人，已而槍折，復曳騎士九人下馬。太祖

壯之曰誠得此輩數十雖萬衆不能當也及戰于達魯古城遼兵一千陣于營外遣往擊之捷懶衝出敵陣大敗其衆攻臨潢府春泰州中西二京皆有功天輔六年授謀克天會四年從伐宋屢以功受賞明年再舉至汴宋人會諸路援兵于睢陽宗望遣與阿里剗將兵二千往拒之敗其前鋒軍三萬于杞縣又破三寨擒宋京東路都總管胡直孺南路都統制隋師元及其三將并直孺二子遂取拱州降寧陵復破二萬軍于睢陽進取亳州聞宋兵十萬且至宗望益以兵四千合擊大敗之其卒二千陣而立馳之不動卽麾軍去馬擊之盡殪擒其將石瑱而還帥府嘉其功賞資優渥宗輔駐兵熙州分遣諸將畧地捷懶以軍五百入六盤山十六寨降其官八十餘民戶四千獲馬二千疋皇統中累加銀青光祿大夫天德初加特進授世襲猛安卒年

六十五海陵遷諸陵於大房山以撻懶作給事太祖命作石像置虜陵前

婆盧火同時有二其一監婁室軍平陝西後爲平陽尹西南路招討使終慶陽尹此爲安帝五代孫舊居安出虎水後徙泰州爲都統賜耕牛五十伐遼時使徵廸古乃兵失期杖之後攻黃龍府與渾熱以四千人往助直櫛里部產良馬太祖使婁盧火及子婆速俱爲謀克共部人辭勒罕轍孛得兄弟先寇耶懶路穆宗令往討至阿里門河二人僞降遂畧馬畜三百而去復掠元勒部二十五寨太祖又令往討婆盧火渡蘇袞河招降旁近諸部因籍丁壯爲軍至特穆爾水執轍孛得殺之復破特鄰城執辭勒罕妻子遂降太祖取燕京宗望率兵七千前行銀术哥出居庸關婁室爲左翼婆盧火爲右翼大敗遼兵遂取居庸追

蕭妃已遠去獲其統軍察刺宜徽查刺并家族牌印就使領其所部後屢守邊有功太宗給以空名宜頭及銀牌并其子副叔各賜衣一襲以甲冑賜所部諸謀克天會十三年加同中書門下平章事天眷元年駐烏骨廸烈地薨贈開府儀同三司諡剛毅以部叔襲猛安爲泰州副都統子朝帶廣威將軍婆速官特進子吾札忽善騎射年二十以本班祇候郎君都督從征伐有功授脩武校尉皇統二年權泰州軍平陝西至涇州大破宋兵於馬西鎮超遷寧遠大將軍襲猛安復獲宗弼權都統海陵伐宋契丹叛與德昌軍節度移室憇同討許以便宜從事大定初除咸平尹駐軍泰州俄改臨潢尹攝元帥左都監與廣寧尹僕散渾坦俱從元帥右都監神土憇率泰州兵及曷懶路兵千五百人解臨潢之圍時移室憇已死城中震恐神土憇與推官

麻珪輔國上將軍阿思憐繕完城郭表請益兵乘城固守契丹不能克遂引衆東行追及于窰歷山押軍猛安獎丹忽刺叔以所部助敵來攻官軍失利泰州節度使烏里雅收兵未至臨潢與敵遇亦敗僅以數騎脫歸敵攻泰州四面登城勢大振城中震駭押軍猛安烏古孫阿里補率軍士循城應敵力戰斫刈其衆敵乃退泰州得完吾札忽使謀克蒲盧渾徙百姓旁邑及險阨之地以俟大軍明年衆甲士萬三千於濟州與神土懣俱從元帥謀衍敗窩幹於長濠戰霧霧河戰陷泉皆有功轉胡里改節度使卒爲人性聰敏有才智善用軍常出敵之不意故能以寡敵衆而所往無不克號爲鶻軍 神土懣宗室贈銀青光祿大夫胡速魯改子年十五事太宗爲左奉宸皇統二年克獲衛除武器署丞累官肇州防禦使以破窩幹功改曷速館節度使

終婆速路兵馬都總管

撒改上京納魯渾河人其先居兀冷窟河身長多力善用槍宗
輔屬之麾下佩以金牌使督軍士天德元年授本班祇候郎君
詳穩後從軍泰州路以爲萬戶領銀木可等猛安戍北邊數有
戰功海陵篡立遣使夏國諭以卽位因令伺彼之意旣還稱旨
擢兵部郎中累會寧尹同知迭剌部族節度旣里本羣牧等使
至曷懶路都總管伐宋授衛州防禦使總管武震軍世宗卽位
遣使召至除昌武軍節度使又爲山東路元帥副都統復改安
化軍大定四年徙鎮安武仍兼副統率山東大名東平三路軍
八萬渡淮會大軍伐宋進至楚州宋遣使奉歲幣還邳州卒
吾丹名卞與阿里刺俱上京司屬司人大定二年收克護衛積
勞授彰化軍節度副使入爲都水監丞導河有勞遷累中都西

京路提刑使徙知歸德府河平軍節度使王汝嘉奏除北京留守未幾改知大興府事坐擅追攝左丞夾谷衡在軍不法以爲失體杖四十時御史大夫久闕左司諫赤蓋高門上言憲紀不振宜選剛正疾惡之人肅清庶務上乃用卞劾尚書孫鐸因買鉉拜參知政事鐸對賀客誦唐張在詩有鬱鬱意坐以降熱惡乞休致遂以金吾衛上將軍致仕卒 阿里刺名膏大定十年以皇家近親收充東宮護衛轉十人長授御院通進從世宗幸上京會皇太子薨特命與滕王府長史臺馳驛往護喪且以膏親密可委令保護金源郡王遭此家難當以禮節其哀哭謹視食飲駕還遷符寶郎除吏部郎中坐犯夜禁奪官罷明昌元年起爲棣州防禦同知上書歷詆宰執復坐譏訕杖罷之還本猛安明年降授宣德州同知名爲武衛軍副都指揮使四遷知大

與府事轉左右宣徽使承安二年拜尚書右丞出爲叅定軍節度使移知濟南府卒 又梅堅塞吾屬司人三寶名奕大定七年以近親充東宮護衛十人長章宗卽位累遷左衛副將軍右副都點檢兼提點尚廐局使無過人才第以久次遷授未幾坐廐馬瘦決三十承安二年改左副都點檢兼職如舊俄授同簽大睦親府事卒爲人貪鄙數以賊敗帝愛其能治園場故進而委信之 崇成本名僕灰泰州司屬司人昭祖玄孫大定十八年收克奉職改東宮入殿小底轉護衛章宗爲原王充本府祇候郎君及爲皇太孫復任護衛卽位授河間府判官以憂去職起復爲宿直將軍累遷武衛軍都指揮使泰和三年卒爲人謹飭有守久侍近密宿衛二十餘年未嘗有過 又阿喜性廉能好學問襲父北京路筈栢山猛安聽訟明決人信而愛之提刑

司上其治狀除彰國軍節度副使改上京留守判官速平路節度同知歷海邳二州刺史皆兼總押軍馬宋統領劉文謙以兵犯宿遷迎擊破之復破威春夏興國舟兵萬餘人斬興國於陣遷鎮國上將軍賜銀幣爲紇石烈執中前鋒渡淮破寶應天長二縣師還遷歸德府同知改泗州防禦使母憂起復大安二年改華州防禦使遷鎮南軍節度使貞祐二年知大名府充馬軍都提控歷橫海安化軍節度使充宣差山東路左翼都提控尋知濟南府事徙沁南軍節度河南統軍使兼昌武軍節度使卒舊史贊曰企自獻祖徙居海姑水納曷里村再徙安出虎水世祖稱海姑兄弟蓋指其所居也完顏十二部皆以部爲氏宣宗詔宗室皆書姓氏然亦有部人以部爲氏非宗室同姓者遂不可辨矣

弘簡錄卷二百二十六

終